

1449 suos in littus desilire. Quod quum illi naviter fecissent, acriter est in ipso littore dimicatum. Fusis hic hostibus atque intra oppidum compulsis, deducta eorum biremi, navale quod proximum oppido fuit, cum aliquot navibus subjecta flamma concremarunt. Direpta ad hæc eodem incurfu suburbana tecta, peregrinis mercibus referta. Inde ad pristinam stationem victor Venetus se recepit, ubi Capellius classem in Alphonsum structam expectare constituit. Tentarunt Veneti, missis ad Sforciam legatis, quia maritimum instabat bellum, terrestri se levare. Ursatus Justinianus & Paschalis Maripetrus ad eum publico nomine accessere, jussique cum eo agere de pace, quæ magnis conditionibus a Mediolanensibus proponebatur. Et jam tentata res erat, quum Crema, quæ Sigismundi Malatestæ ductu (erat is a Florentinis post Caravagianam cladem cum duobus millibus equitum, & peditibus mille jure fœderis Venetis auxilio missus) laboriose pluribus mensibus oppugnata fuerat, Andreæ Danduli opera, nec non Sforcia aliquid juvante, qui eorum deditionem non receperat, Veneto imperio cessit. Gentilis Leonefius ad eam recipiendam cum præsidio ire est jussus. Per eos ipsos dies pax cum Mediolanensibus jam pene confecta, ad Sforciam his conditionibus est delata: ut ille septem urbes, quæ Philippi fuissent, Cremonam, Ticinum, Placentiam, Parmam, Alexandriam, Derthonam, & Novariam haberet: Laudem vero, & (ut alii tradunt) Ticinum Mediolanensibus relinqueret. Has conditiones si ille accepisset, utriusque populi socius haberetur, haberentque Veneti, Gallia pacata, sex equitum millia, Mediolanenses quatuor, Sforcia mille, nec amplius. Sin pacem cum Mediolanensibus nollent, utrorumque hostis esset: ac tum Veneti octo equitum millia ad usum præsentis belli conscriberent, sex ipsi Mediolanenses. Hujusmodi pacis conditiones a Maripetro ad Sforciam delatas, neque probavit ille, neque recusare est ausus: cæterum frendens, gemenisque, multaque de Venetorum fide questus, respondisse dicitur: se non Laudem solum, quam Veneti Mediolanensibus restitutam vellent, sed illas etiam urbes, quas sibi ex fœdere decrevissent, relicturum, si ita eos velle sentiat, quorum

*Crema Venetis deditum.*

*Venetorum & Mediolanensium novum fœdus.*